

四庫全書

子部

欽定四庫全書

格致鏡原卷五十九

大學士陳元龍撰

玩戲器物類一

圍碁

總論 博物志堯造圍碁以教子丹朱或云舜以子商
均愚故作圍碁以教之其法非智不能也 梨軒曼衍
圍碁初非人間之事始出於巴邛之橘周穆王之墓繼
出於石室又見於商山乃仙家養性樂道之具 皮日

休原奕不害則敗不詐則亡不爭則失不偽則亂是奕之必然也雖奕秘再出必用吾意焉夫堯之仁義禮智豈能以害詐之心爭偽之智教其子哉奕之始作必起自戰國縱橫者流矣豈曰堯哉 珍珠船古棋圖之法

以平上去入分四隅為亂交雜難辨徐鉉改為十九字一天二地三才四時五行六宮七斗八方九州十日十一冬十二月十三閏十四雉十五望十六相十七星十八松十九客甚簡便 演繁露今碁方十九道合枰為

碁子三百六十一案李善注韋昭博奕論枯碁三百引
邯鄲淳藝經曰碁局縱橫各十七道合二百八十九道
白黑碁子各一百五十枚 胡應麟筆叢今圍碁十九
行三百六十一路子亦如之宋世同此然漢製十七道
唐局或十八道不可不知也柳子厚記石碁局自然成
紋十有八道可奕又唐詩詠碁有十九條平路之句則
唐製固應十九道其十八道者或碁局稍異間為之耳
楊慎轉注古音碁難見馬融圍碁賦難音義與岳同

碁心并四角各據中一子謂之五嶽言不可動搖也今謂之勢子而中心一子多不下蓋古法與今少異方

言圍碁者自關東齊魯之間謂之奕世說王中郎以

圍碁為坐隱支公以圍碁為手談通玄集圍碁兩無

勝敗曰節

說文節相當也綿免二音

春渚紀聞奕碁古謂之行碁

宋文帝使人齎藥賜王景文時景文與客碁以角置局下神色不變且思行爭劫蓋碁戰所以為人困者以其行道窮迫耳行字於碁家亦有深意不知何時改作著

綦著如著帽著屐皆訓容也不知於綦者有何干涉也
桓譚新論世言圍綦頗類兵法上者張置疎遠多得
道而勝中者務相遮絕爭便求利下者守邊隅趣作罍
目馬融圍綦賦略觀圍綦法於用兵三尺之局為戰
鬪場先據四道守角依傍緣邊遮列往往相望離離馬
目連連雁行踔度間置徘徊中央收取死卒毋使相迎
當食不食反受其殃離亂交錯更相度越守規不固為
所唐突深入貪地殺亡士卒狂攘相救先後并沒班

固奕旨北方之人謂碁為奕局必方正象地則也道必
正直神明德也碁有黑白陰陽分也駢羅列布效天文
也四象既陳行之在人蓋王政也虛設豫置以自衛護
提防周起障塞滿決一孔有關壞頽不振突圍橫行要
厄相劫保角依傍補續不亡 梁武帝圍碁賦園奩象
天方局法地枰則廣羊文犀子則白瑤玄玉至如玉壺
銀臺車廂井欄既見知於曩日亦在今之可觀或方四
聚五花六持七雖涉戲之近事亦臨局而應悉或取結

角或營邊鄙或先點而亡或先撤而死 王無功圍碁
長篇雙關防易斷隻眼畏難全魚鱗張九拒鶴翅擁三
邊 李泌傳泌始見帝方與張說奕使試其能說賦方
圓動靜曰方若碁局圓若碁子動若碁生靜若碁死泌
即答曰方若行義圓若用智動若騁材靜若得意說因
賀帝得奇童 止戈集人能盡數天星則知碁勢 碁
訣取蛻龍牙一枚臨局自然機變橫出 西京雜記賈
佩蘭說在宮時每以八月四日出雕房北戶竹下圍碁

勝者終年有福負者終年疾病取絲縷就北辰星求長命乃免 西京雜記杜陵杜夫子善奕碁為天下第一人或譏其費日夫子曰精其理者足以大裨聖教 抱朴子碁之無比者謂之碁聖故嚴子卿馬綏明於今有碁聖之名焉 魏志王粲觀人圍碁局壞粲復為之碁者不信以帊蓋局使更以他局為之用相比較不誤一道 酉陽雜俎晉鳩摩羅什與人碁拾敵死子空處如龍鳳形 宋書羊玄保善奕碁碁品第三太祖亦好碁

與羊玄保賭郡玄保勝補宣城太守 南史宋明帝好

圍碁置園碁州邑以建安王休仁為園碁州都大中丞
南史到溉特被武帝賞接每與對碁從夕達旦或復
失寢加以低睡帝嘲之曰狀若喪家狗又似懸風槌

酉陽雜俎上嘗與親王碁貴妃立於局前觀之將輸妃
放康國獨子於座側俄上局局子亂玄宗悅 碁天洞
覽元稹與李杓直碁稹已敗乃竊杓直數子嚙之 馮

翊桂花叢談王積薪隨明皇西幸夜宿山中孤姥之家

簷下忽聞姑與婦棊因附身門扉一一密記之遲明王具禮請問出局盡平生之好布子未及數十姑謂婦曰是子可教以常勢因指示攻守殺奪救應防拒之法其意甚略曰此已無敵人間矣謝而別回顧失向之室矣

棊訣王積薪夢青龍吐棊經九部授已其藝頓精

棊天洞覽王積薪每遊必攜圍棊短具畫紙為局與棊子并盛竹筒中繫於車轅馬鬣間道上雖遇匹夫亦與對手勝則徵餅餌牛酒北夢瑣言滑能善奕忽有一

小子自云張清與能對奕思甚精敏能異而詰之曰我
非世人天帝使我召公著碁能忽奄然

碁子 碁訣關城中貴家以紫檀心瑞龍腦為碁子

杜陽編唐大中中日本國王子來朝云本國之東三萬
里有集真島島上有凝霞臺臺上有手譚池池中有玉
碁子不由制度自然黑白分明冬溫夏涼謂之冷煖玉
洪邁夷堅志唐時十二玉碁子按十二時字置於水
中逐時浮出 山海經休與之山有石名曰帝臺之碁

五色而文狀如鵝卵注博碁也今圍碁子黑與白似石
陳貞父寶雞錄登華山明星峰道者有石室老君棋
正在其前三十二子鐵所鑄也子重五斤非老君不能
措手王鏊震澤長語宣宗一日過城上瞰閣老何為
曰方對奕何不聞落子聲曰碁以紙上笑曰何陋也明
日賜象牙碁一副至今藏閣中

碁盤 彙苑紋楸碁盤也枰線道也線間方目曰方罫
碁天洞覽元頤本枰碁聲與律呂相應盖用響玉碁

盤非有異術也 升菴外集章友直女以椽筆畫盤筆
筆相似無毫髮差 南史武陵王甚貧嘗破荻為片縱
橫以為碁局指點行勢遂至名品 清異錄明皇因對
寧王問卿近日碁神威力何如王奏臣憑托陛下聖神
庶或可取上喜呼將方亭侯來二宮人以玉界局進遂
與王對手 夷門廣牘日本國產如楸玉類楸木琢為
碁局光潔可鑒 瀟湘錄馬舉鎮淮南有一叟謁之稱
南山木強人能論兵法驗之乃一碁局耳 搜神記昔

有人入南谷山中見一小池橫石橋遂驟馬過橋見二少年臨池奕棋置白玉棊局見騎馬者拍手負局而走山堂肆考宋陸象山少時常坐臨安市觀棊初未を得乃買棊局一副歸而懸之於室卧而仰觀之者兩日忽悟曰河圖數也邢居實拊掌錄葉濤好奕棊王介甫作詩切責之終不肯已奕者多廢事不以貴賤嗜之率皆失業故人目棊枰為木野狐言其媚惑人如狐也柳宗元柳州山水記仙奕山始登者得石枰於上黑

肌而赤脈十有八道可奕 南方草木狀桄榔樹似枰
櫚木性如竹紫黑色有文理工人解之以製奕枰出九
真交趾

棊筒 道源注棊函棊筒也

象棋

事物紀原雍門周謂孟嘗君云足下燕則鬪象棋疑戰
國時已有此 丹鉛總錄世傳象棋為周武帝製按後
周書天和四年帝製象經成殿上集百寮講說隋經籍

志象經一卷周武帝撰有王褒注王裕注何妥注又有
象經發題義又據小說周武帝象經有日月星辰之象
意者以兵機孤虛衝破寓於局間決非今之象戲車馬
之類也若如今之象戲芸夫牧豎俄頃可解豈煩文人
之注百僚之講哉 太平御覽象戲周武帝所造而行
棊有日月星辰之目與今所為不同 牛僧孺玄怪錄
寶應元年汝南岑順於呂氏故宅夜聞鼙鼓聲介冑人
報曰金象將軍傳語與天那賊會戰順明燭以觀之夜

半後東壁鼠穴化為城門有兩軍列陣相對部伍既定
軍師進曰天馬斜飛度三止上將橫行擊四方輜車直
入無迴翔六甲次第不乖行於是鼓之兩軍俱有一馬
斜去三尺止又鼓之各有一步卒橫行一尺又鼓之車
進須臾砲石亂下云云因發掘東壁乃古冢有象戲局
車馬具焉 晁無咎序象戲戲兵也黃帝之戰驅猛獸
以為陣象之雄也故戲兵而以象戲名之余為兒時無
他弄見設局布棋為此戲者縱橫出奇愕然莫測以為

小道可喜也稍長觀諸家陣法雖畫地而守規矩有截而變化舒卷出入無倪其說亦可喜暇時因求所謂象戲者按之以消永日蓋局縱橫路十一棊三十二為兩軍耳意苦而狹也嘗試以局縱橫路十九棊九十八廣之意少放焉然按圖置物計步而使終亦膠柱而已矣而智者用之則十九者之間盡強弱之形九十八者之間盡死生之勢而十九九十八之外死生強弱可循環無窮飽食終日得吾說而為之則涿鹿之縱橫猶目前

矣 胡應麟筆叢唐人象戲之製玄怪錄岑順一事可
據馬斜行三路卒橫行一路正與今同獨車直進不迴
則類於今之卒恐其他不盡合也據晁序則宋時象棋
縱橫皆十一路而今縱十路橫九路與宋時亦頗不合
又宋人事物紀原亦載岑順事以為與宋正同則唐宋
固無異而國朝或未盡同也

彈棊

西京雜記成帝好蹴鞠羣臣以為勞體非至尊所宜劉

向乃作彈碁以獻 世說彈碁始自魏宮內粧奩戲也
魏文帝於此伎特好用手巾拂之無不中有客著葛巾
低頭拂碁妙踰於帝 藝經彈碁二人對局黑白碁各
八枚先列碁相當下呼上擊之 顏氏家訓彈碁亦近
世雅戲消愁釋憤時可為 事物紺珠彈碁局方二尺
中心高如覆盆其顛為小壺四角微起兩人對局 世
說劉真長始見王丞相時盛暑之月丞相以腹熨彈碁
局曰何如乃洵吳人以冷為洵

格五

漢書吾丘壽王以善格五召待詔注格五簾也 說文

行基相塞謂之簾

投瓊曰博不投瓊曰塞瓊今骰子也

鮑宏塞經塞有

四采

塞即將邊士也四采士縱行四角而賭采也

塞四乘五是也

四即縱行所至四角

也五四角縱對中心故曰四乘五

至五即格不得行故謂之格五

格止也至

五言士所至無過五處五之外即止不得行也

事物原始格五即今之挨三

頂五擦七馱八之基也 酉陽雜俎小戲中於耍局一

枰各布五子角遲速名蹇融 珊瑚鈎詩話奕基取一

道人行五子謂之蹙融融者戎也生於黃帝蹙鞠戎旅之間為戲耳庾元規曰蹙戎者今之蹙融也漢謂之格五取五子相格之義以名之耳 夢溪筆談蹙融或謂之蹙戎漢書謂之格五雖止用數棊共行一道亦有能否其法已常欲有餘裕而致敵人於險

雙陸

六博
握槊

檮蒲
長行

類要雙陸乃出天竺涅槃經名為波羅塞戲 洪遵雙陸序雙陸博局戲名以異木為方槩槩中彼此內外各

有六梁故名雙陸其打馬拽子視明瓊為標的最近古
號為雅戲始於西竺流於曹魏盛於梁陳魏齊隋唐間
太祖播之聲詩紀於奎文閣今殊方偏域類能為之三
佛齊國曰闍婆占城曰質犁真臘曰莎 事物紺珠雙
陸後一梁為胘前一梁為門兩馬相比為梁 事林廣
記北雙陸盤如棊盤之半而長兩門二十四路皆刻出
用象牙實之以勃海櫟木為重蓋不假施漆而塵垢不
能侵或以花石砌飾以木承之以白木為白馬烏木為

黑馬富者以犀象為之馬底員平而殺其上長三寸二分上徑四分下徑寸一分大抵如今人家所用搗衣椎狀番禺人以板為局布黑道而漆之或以紙或畫地為之以黃楊木為白子桄榔木為黑子底平衲短如截蒂如浮圖形三佛齊占城真臘南皮以花梨木為板刀劃成路多席地置板其上蕃王則板下以銅為簧如響板然拍子成時鏘然有聲以為樂以象牙為白子烏梅木為黑子或以紅牙為黑子

六博 名義考博局戲也今雙陸古謂之十二棊又謂之六博又謂之五白博雅云投六箸行六棊故為六博箸箸也今名骰子自么至六曰六箸棊局齒也內外各六曰六棊此六博之義也古者烏曹作博以五木為箸有梟盧雉犢塞五者為勝負之采梟以食為義便則食不便則為餘行為最勝盧黑色次梟亦為勝故博者云呼盧此五白之義也 楚辭晉制犀比費白日注晉制工制作博箸比集犀角為雕飾投之如白日之光 韓

子秦昭王令工施鉤梯而上華山以松柏之心為博箭
長八尺棊長八寸勒之曰昭王常與天神博於此 西
京雜記許博昌安陵人也善六博其術曰方畔揭道張
張畔揭道方張究屈玄高高玄屈究張法用六箸或謂
之究以竹為之長六分或用二箸博 鮑宏博經六博
用十二棊六棊白六棊黑所擲頭謂之瓊瓊有五采刻
為一畫者謂之塞刻為兩畫者謂之白刻為三畫者謂
之黑一邊不刻者五塞之間謂之五塞 王莽傳平原

女子遲昭平能說經博以八投服虔注博奕經以八箭投之 醉鄉日月古者交歡多為博列子曰虞氏設樂飲酒擊博樓上其齒以牙飾以箭長五寸其數六刻一頭作鶴形仙經云六鶴齊飛蓋其名也宋齊以降多以擣蒲頭戰酒骰子之制亦六鶴齊飛之變也 顏氏家訓古為大博則六箸小博則二炁今無曉者比世所行一炁十二碁數術淺短不足可翫 孔六帖肅宗在彭原解舍隘狹帝與張良娣博打子聲聞於外乃潛令刻

乾樹子不欲有聲

擣蒲 名義考擣蒲局戲即今雙陸按韻會擣似樁北
人呼山樁江東呼虎目葉脫處有痕如擣蒲子故名擣
虎目與擣蒲子皆謂葉脫處形迹也知擣以擣蒲得名
則知擣蒲以骰子為義雙陸有骰子也 博物志老子
入胡作擣蒲 演繁露擣蒲家謂二白三黑為捷捷惡
齒也御覽曰六博五擲皆捷不為不能則知捷為惡齒
也梟名甚多鄧艾曰六博得梟者勝此艾因牙上有梟

姑為安衆之言耳韓子曰儒何以不好博勝者必殺梟
是殺其所貴也儒者以為害義故不博據此言之則梟
固為善齒而殺梟者又當得雋則梟之采品甚低非廬
比也 擣蒲經凡近關及后一子謂之塹迫關及前一
子謂之坑落坑塹非貴采不出凡一馬打一馬如遇退
六踏馬則一馬可踏三馬故世不循時者謂之踏坑塹
云 國史補洛陽令崔師本好為古文擣蒲其法三分
其子三百六十限以二關人執六馬其骰五枚分上為

黑下為白黑者刻二為犢白者刻二為雉擲之全黑乃為盧其彩十六二雉三黑為雉其彩十四二犢三白為犢其彩十全白為白其彩八四者貴彩也開為十二塞為十一塔為五禿為四梟為二擲為三

二六者
雜采也

貴彩得

連擲得打馬得過關餘彩則否新加進六兩彩 塵史

世之糾率蒲博者謂之公子家又謂之囊家擲蒲經云一有賭兩人以上須置囊合依條檢文書了投錢入囊家亦謂之錄事 晉中興書陶侃為荊州見佐史博具

投之於江曰博殷紂所造諸君並國器何以為至將吏則加鞭朴曰擣菹者牧猪奴戲耳晉載記慕容寶與韓黃李根等宴因舉擣菹危坐整冠誓曰擣菹有神豈虛言哉若富貴可期頻得三盧於是三擣俱得盧寶拜而受賜異苑有人乘馬山行見二老翁相對擣菹遂下馬以策拄地而觀之自謂俄頃視其馬鞭漼然已爛顧瞻其馬鞍骸枯朽

握槩後魏李邵序魏時浮陽高光宗善擣菹趙國李

幼序洛陽丘河奴並工握槊此蓋胡戲近入中國云胡
王有弟一人遇罪將殺之弟從獄中為此戲以上之意
言孤則易死也世宗以後大盛於時曹植作長行局即
雙陸也胡王作握槊亦雙陸也魏書爾朱世隆與元
世雋握槊忽聞局上歟然有聲一局子盡倒立

長行國史補今之博戲有長行最盛其具有局有子
子黑黃各十五擲采之骰有二其法生於握槊變於雙
陸天后嘗夢雙陸不勝狄梁公言宮中無子是也後人

新意長行出焉又有小雙陸圍透大點小點遊談鳳翼之名然無如長行也監險易者喻時事焉適變通者方易象焉王公大人頗或耽翫至於廢慶弔忘寢食及博徒用之於是彊各爭勝謂之掠零假借分畫謂之囊家囊家什一而取謂之乞頭有通宵而戰者有破產而輸者嘉話錄貞元中有杜勸好長行皆有佳名各記有輕妙夏中用者為冷子取其似蕉葛之輕健而名之

骰子 附骰盆

詳制事原骰子聲譜云博陸采名也魏陳思王曹子
建製雙陸局始置骰子二至唐末有葉子之戲未知誰
置遂加骰子至於六七脩類藁有宦客築魏州城得
窑燒骰子數斗詢之士夫莫識其故予意骰子陳思王
所製子建當時正都於許恐後世之莫傳故埋藏以需
人間玩弄也筆叢六博者投六箸行六棊其時未有
骰子也骰子當在魏晉間與握槊相先後古云起自陳
思不必盡然疑漢以前未有也李濟翁資暇錄投子

者投擲於盤筵之義今或作頭字言其骨頭所成非也
因此兼有作骰字者案諸家之書骰即股字爾不音投
史記蔡澤說范雎曰博者或欲大投裴注云投瓊也則
知以玉石為投擲之義安有頭骰之理哉 程大昌演

繁露博之流為擲蒲為握槊

即雙陸也

為呼博為酒令體製

雖不全同而行塞勝負取決於投則一理也蔡澤說范
雎曰博者或欲大投班固奕指曰博懸於投不必在行
投者擲也桓元曰劉毅樗蒲一擲百萬皆以投擲為名

也古惟斲木為子一具凡五子故名五木後世轉而用石用玉用象用骨故列子之謂投瓊律文之謂出玖凡瓊與玖皆玉名也

演繁露五木之制至晉世猶復用

木然列子已言投瓊則周末已嘗改玉骨也耶或者形製仍同五木而質已用玉石也

山堂肆考古者烏曹

氏作博以五木為子有梟盧雉犢塞為勝負之采博頭有刻梟形者為最勝盧次之雉犢又次之塞為最下

演繁露方其用木也五子之形兩頭尖銳中間平廣狀

似今之杏仁惟其尖銳故可轉躍惟其平廣故可以鏤
采也凡一子悉為兩面其一面塗黑黑之上畫牛犢以
為之章犢者牛子也一面塗白白之上即畫雉雉者野
雞也凡投子者五皆現黑則其名盧盧者黑也言五子
皆黑也五黑皆現則五犢隨現從可知矣此在擲蒲為
最高之采按木而擲往往叱喝使致其極故亦名呼盧
也其次五子四黑而一白則是四犢一雉則其采名雉
用此比盧降一等矣自此而降白黑相雜每每不同故

或名為梟即鄧艾言云六博得梟者勝也或名為捷謂五木十擲輒捷非其人不能是也庶物異名疏晉張

湛云古博經曰擲采以瓊玃

則音

方寸三分長寸五分銳

其頭鑽瓊四面為眼亦名為齒

演繁露鮑宏博經曰

用十二棊六棊白六棊黑所擲頭謂之瓊瓊有五采畫

為一畫者謂之塞刻為兩畫者謂之白刻為三畫者謂

之黑一邊不刻者五塞之間謂之五塞案此以刻畫多

少為采名而無犢雉之象又與劉裕諸人所不同

丹鉛續錄晉謝艾傳梟者邀也六博得邀者勝是知梟
即骰子之么也 筆叢六朝盛習擲蒲以五木行之其
制如銀杏仁僅二面程氏演繁露考訂最為精詳儼然
六朝遺制在目其彩初無么二三四五六等稱丹鉛錄
以梟為么實所未諭且五木止用木五枚故曰五木詎
得六采之么耶 演繁露五木止有兩面骰子則有六
面故骰子著齒自一至六為采亦益多率其大而言之
則是裁去五木兩頭尖銳而蹙長為方既有六面又著

六數不比五木但有白黑兩面矣自有骰子以後擲蒲
尖長之子遂廢閣不用 筆叢投子六面者不知起於
何時余意正當與握槊先後以其數皆限於六耳或謂
列言投瓊孔稱博奕當起此時不知穆天子傳王兩與
隱士井公博又在孔列之先然是五木之類非六面者

劉禹錫觀博篇主人陳握槊之器於廡下有博齒

謂骰

也其製用骨觚稜四均鏤以朱墨耦而合數取應日月

視其轉止依於爭道 演繁露唐世則鏤骨為竅朱墨

雜塗數以為采亦有出意為巧者取相思紅子納置竅中使其色明現而易見故溫飛卿艷詞曰玲瓏骰子安紅豆入骨相思知也無凡此二者即今世通名骰子也本書為投後轉呼為頭筆叢今投子六面二十一點正與唐同或笑投子既方安得無六面者是不知外國投子有四面而無么六者見洪氏譜又有二面者古五木皆投子類也又今骰子製甚小大者不過三數分無至寸者而唐人骰子凡四點當加緋者或嵌相思子其

中相思子即今紅豆并四枚嵌一面則唐投子將近方寸矣 張端義貴耳集市井呼盧盧四也博徒索采曰四紅赤緋皆一骰色也楚辭招魂成臯而年年即盧也唐李翱撰五木經元革註云雉為二臯為六盧為四

潘氏紀聞骰子飾四以朱者玄宗與貴妃采戰將北唯重四可轉敗為勝上擲而連呼叱之骰子宛轉良久而成重四上大悅命將軍高力士賜四緋 劉賓客嘉話李二十六丈丞相因堂弟居守誤收骰子糾者罰之丞

相曰何罰之有司徒曰汝向閑時把他堂印將去又何辭焉飲酒家謂重四為堂印 六博碎金一除紅譜蓋

楊提舉廉夫當元季之亂避兵吳下與二三遊好妓小蓉瓊花等日賭除紅其負者脫妓鞋觴之謂除紅者除四紅言之也或曰宋天官冢宰朱河所作也故俗誤為朱窩云 湘烟錄鄭氏書目有骰子選格漢官儀彩選新彩選文武彩選元豐官制彩選慶厯彩選圖尋仙彩選選仙格選佛圖 珍珠船宋居士說擲骰子法咒云

伊帝彌帝彌揭羅帝念滿十萬遍彩隨呼而成

別名 列子樓上博者射明瓊張中反兩揔魚而笑注
明瓊今骰子張中張其具以射中否為勝負也揔魚者
骰采之名於五白之中反其兩揔魚之采 丹鉛總錄
李洞詩六赤重新擲印成六赤者古之瓊累今之骰子
也 湘烟錄穴骰亦骰子佳名見房千里骰子選格序
清異錄博徒隱語以骰子為惺惺二十一又曰象六
謂六隻成副 清異錄開元中後宮繁衆侍御寢者難

於取舍為彩局以定之集宮嬪用骰子擲最勝一人乃
得專夜官璫私號骰子為判角媒人 事林廣記三佛
齊閣婆真臘大食以木為骰子六面南皮占城以烏木
或角為之長二寸許無么六三佛齊閣婆占城骰子曰
胡纏么曰隆二曰塗打白三曰帝伽四曰暗不五曰班
滓六曰南真臘骰子曰撒家么曰收二曰拔毘三曰琳
四曰不琳毘五曰班六曰辛大食么曰亦二曰塗打三
曰插打四曰擦打五曰班打六曰失打

骰盆 留青日札今之骰盆亦作投盆而唐人乃作頭盤劉中山戲贈白太傅白家惟有盃觴興欲把頭盤打少年又猱猱揖觥使調笑擲骰盆


打馬

陞官圖

李易安打馬序長行葉子博塞彈棊世無傳者藏酒擲蒲雙蹙融今漸廢絕大小象戲奕棊亦止可容二人獨采選打馬特為閨房雜戲嘗恨采選叢繇勞於檢閱能通者少難遇勑敵打馬簡要又苦無文 事物紺珠打

馬用銅或牙角為錢樣共五十四枚上刻良馬名布圖
四面以投子擲打之 胡應麟筆叢房千里骰子選格
序云開成三年春予自海上北徙舟行次洞庭之陽有
風甚急繫船野浦下三日遇二三子號進士者以穴骰
雙雙為戲更投局上以數多少為進身職官之差數豐
貴而約賤卒局有為尉掾而上者有貴為相臣將臣者
有連得美名而後不振者有始甚微而歛升於上位者
大凡得失不係賢不肖但卜其偶不偶耳按此戲即今

陞官圖



格致鏡原卷五十九

欽定四庫全書

子部

格致鏡原卷

六十三

詳校官中書臣羅錦森

侍讀臣孫球覆勘

總校官中書臣朱鈐

校對官原任典簿臣郭祚熾

謄錄監生臣鄧友樞

欽定四庫全書

格致鏡原卷六十

大學士陳元龍撰

玩戲器物類

牙牌

諸事備考宋宣和二年有臣上疏設牙牌三十二扇共
記二百二十七點以按星辰布列之位譬天牌二扇二
十四點象天之二十四氣地牌二扇四點象地東西南
北人牌二扇十六點象人之仁義禮智發而為惻隱羞

惡辭讓是非和牌二扇八點象太和元氣流行於八節之間其他牌名類皆合倫理庶物器用表上貯於御庫疑繁未行至宋高宗時始詔如式頒行天下

葉字

咸定錄唐李邵為賀州刺史與妓人葉茂連江行因撰骰子選謂之葉子咸通以來天下尚之不知正應本朝年祚正體書葉子乃二十世木子自武德至天祐恰二十世歸田錄葉子格者自唐中世以後有之說者云

因人有姓葉號葉子青者撰此格因以為名此說非也
唐人藏書皆作卷軸其後有葉子其制似今策子凡文
字有備檢用者卷軸難數卷舒故以葉子寫之如吳彩
鸞唐韻李邵彩選之類是也散子格本備檢用故亦以
葉子寫之因以為名爾唐世士人宴聚盛行葉子格五
代國初猶然後漸廢不傳今其格世或有之而無人知
者惟昔楊大年好之仲待制簡大年門下客也故亦能
之大年又取葉子彩名紅鶴阜鶴者別演為鶴格升

菴外集葉子如今之紙牌酒令鄭氏書目有南唐李後
主妃周氏徧金葉子格 農田餘話今之葉子戲消夜
圖相傳始於宋太祖令後宮人習之以消夜 潘之恒
葉子譜錢製圓而孔方取象於大反數於空故尊空沒
文空者所以貯也當其無有貯之用屬波斯獻焉次稱
鑿客鑿者獸食之餘井上有亭是也里人目為枝花枝
花者花未成果故自一至九咸呼為果本枝花而得名
而文錢為最初之義其數十一葉而極於九索以貫錢

百文為索極於一而尊於九九者數之盈十索則名貫
矣故去十為萬始焉葉凡九萬者索之累十而得名者
也極一而尊九不居其十以十者有所總也葉數亦如
索十舉成數一不必紀而二首焉以偶對百百而千千
而萬示極而不孤處尊而不汰數之成也葉得十一野
史贊曰履其成無忘其空空以基之成以息之是四十
張之所由作也

藏鈞

辛氏三秦記漢昭帝母鈞弋夫人手拳而有國色先帝寵之世人藏鈞之戲法此也風土記義陽臘日飲祭之後叟嫗兒童為藏鈞之戲分為二曹以效勝負若人偶即敵對人奇即人為遊附或屬上曹或屬下曹名為飛鳥以齊二曹人數一鈞藏在數手中曹人當射知所在一藏為一籌三籌為一都荆楚歲時記歲前為藏彊之戲注周處成公綏並作彊字藝經庾闡則作鈞字其事同也酉陽雜俎舊言藏鈞起於鈞弋衆人分曹

手藏物探取之又令藏鈎刺一人則來往於兩朋謂之
誡鷗 東皐雜錄孔常甫言唐人詩有云城頭椎鼓傳
花板席上搏拳握松子乃知酒席藏闔為戲其來已久

意錢

後漢梁冀傳能為意錢之戲 何承天纂文意錢者一
曰詭億一曰射意一曰射數一曰持掩即攤錢也 李
濟翁資暇錄錢戲有每以四文為一列者即史傳所云
意錢是也俗謂之攤錢亦曰攤鋪其錢不使疊映欺惑

也疾道之故謠其音攤為蠶齧反音鋪為蒲厥義此耳
今人書此錢戲率作擲蒲字何貶擲蒲之甚耶按擲蒲
起自老子今亦為呼盧者不宜雜其號於錢說攤鋪之
義皎然可見

投壺

物原殷臣薛侯製投壺 禮記投壺之禮主人奉矢司
射奉中使人執壺主人請曰果有枉矢哨壺請以樂賓
註投壺者主人與賓燕飲講論才藝之禮也中者盛算

之器士鹿中大夫兕中刻如兕鹿而伏背上立圓圈以
盛算也 禮記投壺為勝者立馬一馬從二馬三馬既
立請慶多馬注立馬者取算以為馬表其勝之數也謂
算為馬者馬為威武之用投壺習射皆以習武也 禮

記疏投壺有三處日中則于室日晚則于堂大晚則于

庭中各隨光明故也矢有長短隨地廣狹室中狹矢長

五扶

四指曰扶五扶者二尺也

堂上稍廣矢長七扶

二尺八寸

中庭廣矢

長九扶

三尺六寸

矢有長短而司射度壺則皆使去賓主之

席各二矢半也 禮記算長尺二寸壺頸脩七寸腹脩
五寸口徑二寸半容斗五升壺中實小豆焉為其矢之
躍而出也壺去席二矢半矢以柘若棘毋去其皮 魏
邴鄆淳投壺賦植茲華壺鳧氏所鑄厥高二尺盤腹脩
頸飾以金銀文以雕鏤象物必具距筵七尺傑焉植駐
矢維二四或柘或棘豐本纖末調勁且直執竿奉中司
射是職 傅玄賦序投壺者所以矯懈惰而正心 司
馬溫公投壺格序夫投壺細事遊戲之類而聖人取之

以為禮何哉夫審度於此取中於彼仁道存焉疑畏則疎惰慢則失義方象焉左右前却過分則差中庸著焉得一失二成功盡棄誠謹明焉仙傳拾遺東王公與

玉女投壺每投十枝百二十梟設有入不出者天帝為

之醫噓

梟一作嬌醫噓天笑開翕也

西京雜記武帝時郭舍人善

投壺以竹為矢不用棘也古之投壺取中而不求還故實小豆惡其矢躍而出也郭舍人則激矢令還一矢百餘反謂之為驍言如博之擊梟於掌中為驍傑也顏

氏家訓投壺之禮近世愈精古者實以小豆為其矢之躍也今則唯欲其驍益多益喜乃有倚竿帶劍狼壺豹尾龍首之名其尤妙者有蓮花驍汝南周瓚會稽賀徽並能一箭四十餘驍賀又嘗為小障置壺其外隔障投之無所失也聞見錄邵康節赴河南尹李君錫會投壺君錫末箭中耳君錫曰偶爾中耳康節應聲曰幾乎敗壺坐客以為的對

彈

吳越春秋陳音謂越王曰臣聞弩生於弓弓生於彈彈起於古之孝子古者人民朴質饑食鳥獸渴飲霧露死則裹以白茅投於中野孝子不忍見父母為禽獸所食故作彈以守之絕鳥獸之害故歌曰斷竹續竹飛土逐

穴

同肉

後漢李尤彈銘昔之造彈起意弦木以丸為矢

合竹為樸漆飾以靨不用筋角丸彈之利以弋鳬鶩

東方朔記朔對驃騎難曰以珠彈不如泥丸各有所用也西京雜記韓嫣好彈常以金為丸一日所失者十

餘長安為之語曰苦饑寒逐彈丸京師兒童每聞媽出
彈輒隨往望彈丸所落而拾之 西京雜記長安五陵
人柘木為彈真珠為丸以彈烏鵲 合璧事類俠客以
蘇合木為彈 南齊書垣榮祖最善彈彈鳥毛盡而鳥
不死海鵠羣翔榮祖登城樓彈之無不折翅 南部烟
花記陳宮人喜於春林放柘彈 北史李元忠性甚工
彈彈桐葉常出一孔擲棗栗而彈之十中七八 放懷
集李少微子女頗多每退朝於庭樹撒槐膠彈子數百

枚令諸小兒爭取之以為戲笑終日不倦戲已復收於篋
酉陽雜俎貞元末閬州僧靈鑒善彈常自為彈丸
其彈丸方用洞庭沙岸下土三斤炭末三兩瓷末一兩
榆皮半兩泔澱二勺紫礦二兩細沙三分藤紙五張渴
搗汁半合丸味和擣三千杵齊手丸之陰乾 吳越備史
錢鏐每夕彈金丸於牆樓之外使宿直者畢應 史記
燕太子丹自喜得荆軻永無秦憂日與軻之東宮臨池
而觀軻拾塼投黿太子令人奉金丸進之 珍珠船有

術士於腕間出彈子二九皆五色叱令變即化雙燕飛騰名燕奴又令變即化二小劍交擊須臾復為丸入腕中水經注瀘水旁瘴氣特惡氣中有物不見形其作有聲中木則折中人則害名曰鬼彈

毬

附毬子

荆楚歲時記按劉向別錄曰寒食蹴鞠黃帝所造以練武士本兵勢也或云起於戰國案鞠與毬同古人蹴以為戲也庶物異名疏風俗通云毛丸謂之鞠三蒼

解詁鞠毛丸耳蹋戲 演繁露楊子曰梲革為鞠亦各有法革皮也梲革為鞠即後世皮球之斜作片瓣而縫合之即今之氣毬也顏師古曰鞠以皮為之實之以毛踏蹙而戲今世皮球中不置毛而皆砌合皮革待其縫砌已周則遂吹氣滿之氣既充滿鞠遂圓實所謂火中燭了水中揉者欲其皮寬而能受氣也詳此意制當是古時實之以毛後加巧而實之以氣也 劉放詩話鞠之制晚唐已不同矣歸氏子弟嘲皮日休云八片尖皮

砌作毬火中燂了水中揉一包閑氣如常在惹踢招拳
卒未休今柳三復能之述曰背裝花屈膝白打大廉斯
進前行兩步蹻後立多時柳欲見晉公無由會公蹴毬
後園偶迸出柳挾取之因懷所業戴毬以見公出書再
拜者三每拜毬起復於背脅幞頭間公乃笑而奇之遂
延於門下 詞林海錯韋莊詩內官初賜清明火上相
閑分白打錢王建詩寒食內人常白打庫中先散與金
錢白打即今之蹴鞠戲也 事物紺珠氣毬兩人對踢

為白打三人角踢為官場毬會曰員社無終嘉父制陳
力之事故附於兵法 百官志中尚署寒食獻毬 盧
氏雜記寒食賜侍臣帖繡綵毬繡草宣臺 五侯鯖一
縫毬道士徐博能縫之 太平清話踏鞠始於軒后軍
中練武之劇又有袞弄飛弄之技不知始於何人國初
彭氏雲秀以女流清芬挾是技遊江海叩之謂有解一
十有六詹同文贈之以袞弄行 酉陽雜俎有人熊葫
蘆云翻葫蘆易於翻鞠 演繁露軍中打毬之戲則以

杖拂毬使之馳走而用快馬逐之尚存鞠域之法

韃子 事物原始今時小兒以鉛錫為錢裝以雞羽呼為韃子三四成羣走踢有裏外廉拖鎗聳膝突肚佛頂珠剪刀拐之名色亦蹴鞠之遺事也

鞦韆

荆楚歲時記鞦韆本北方山戎之戲以習輕趨者後中國女子學之乃以綵繩懸木立架士女炫服坐立其上推引之名曰鞦韆楚俗亦謂之施鉤湮槃經謂之胃索

古今藝術圖秋千本山戎之戲自齊桓公北伐山戎
此戲始傳中國 張有復古編漢武後庭繩戲本曰千
秋祝壽詞語訛轉為秋千又為鞦韆 天寶遺事天寶
宮中至寒食節競築鞦韆令宮嬪輩嬉笑以為樂帝常
呼為半仙之戲

紙鳶

稗史類編紙鳶俗謂之風箏 誠齋雜記韓信約陳豨
從中起乃作紙鳶放之以量未央宮遠近欲穿地入宮

中獨異志梁武太清三年侯景圍臺城遠不通問簡
文作紙鳶飛空告急於外侯景謀臣王偉謂景曰此紙
鳶所至即以事達外令左右善射者射之及墮皆化為
鳥飛入雲中不知所往事物原始紙鳶古傳韓信所
作按六帖云五代漢李業與隱帝為紙鳶於宮門外放
之今春時小兒紙鷁是也埤雅昔墨子作木鳶飛三
日不集今人乘風放紙鳶輒引絲而上令小兒張口
望視以洩內熱史虛白釣磯立談韓熙載謂宋齊丘

曰今旦出郊見羣兒為飛鳶之戲夫飛鳶之初逝也其
絲發於綸緩急在掌握之間或上或下唯羣兒所欲及
空迴風迅線尾端直時或激昂動搖羣兒相語曰此
名索線也慎不可縱縱則斷線而去矣執線輪者心知
其如此而力不能加既縱之後怵怵如鼓危絃其聲琮
琤忽一得勢則大挽裂以往或盤珊太虛之上或投於
滄洲浩渺之外或冒於積莽翳薈之間羣兒躡斷緒窮
荒徑盡日力而不可得踵穿衣決而返

擊壤 拋壻

周處風土記壤以木為之前廣後銳形似履長尺三寸將戲先側一壤於地遙於三四步外以手中壤擊之中者為勝 庶物異名疏藝經擊壤古戲也釋名野老之戲樂書云此制與堯時異吳盛彥擊壤賦有云因風托勢罪一殺兩此又後來童少為之非老人戲也 詞林海錯宋世寒食有拋壻之戲兒童飛瓦石之戲也梅都官禁烟詩窈窕踏歌相把袂輕浮賭勝各飛壻壻七禾

切或云起於堯民之擊壤

拔河 拖鉤

景龍文館記四年清明中宗幸梨園命侍臣為拔河之戲以大麻絙兩頭繫十餘小索每索數人執之以挽力弱為輸時七宰相二駙馬為東朋三相五將為西朋僕射韋巨源少師唐休璟以年老隨絙而踣久不能起帝以為笑樂 荆楚歲時記立春日為拖鉤之戲以綆作蔑纜相罾綿亘數里鳴鼓牽之按公輸自游楚為載舟

之戲退則鈎之進則強之名曰鈎強遂以鈎為戲起此
秦京雜記寒食節內僕司車與諸軍使為繩橛之戲
合車轍道兩頭打大橛張繩橛上高二尺許須緊榜定
駕車盤轉碾輪於繩上過不失者勝落輪繩下者輸皆
裝飭車牛賭物動以千計 留青日札今小兒兩頭拽
索而對挽之力強者牽弱者而仆以為勝負笑樂此唐
清明節拔河之戲也當時君臣亦以此為樂不興甚矣

角觝

漢武故事未央庭中設角觝之戲六國所造也 西京賦注角觝兩兩相當角力技藝故名角觝

傀儡 附影戲

梨軒曼衍按列子云周穆王時巧人名偃師所造倡者能歌舞王與盛姬觀之舞罷則瞬目以招王之左右王怒欲殺偃師偃師懼立剖散倡者皆草木膠漆之所為此是傀儡之始 樂府雜錄傀儡子起於漢祖平城之圍其城一面即冒頓妻閼氏兵強於三面陳平訪知閼

氏妬忌造木偶婦人運機關舞埤間閼氏望見謂是生人慮下城冒頓必納遂退軍後翻為戲其引歌舞者曰郭郎髭髮善戲笑凡戲場必在排兒之首北齊書後

主雅好傀儡謂之郭公顏氏家訓或問俗名傀儡子

為郭禿有故實乎答曰風俗通云諸郭皆諱禿當是先

世有姓郭而病禿者滑稽調戲故後人為其像呼為郭

禿爾梁銍傀儡吟刻木牽絲一老翁都城紀勝百

戲有弄懸絲傀儡杖頭傀儡水傀儡肉傀儡

以小兒後生輩為之

凡傀儡數演烟粉靈怪故事鐵騎公案之類

影戲 搜神記故老相承言影戲之原出於漢武帝李夫人之亡齊人少翁言能致其魂上念夫人無已迺使致之少翁夜為方帷張燈燭帝坐他帷自帷中望見之彷彿夫人象也故今有影戲 都城紀勝凡影戲乃京師人初以素紙雕鏤後用彩色裝皮為之公忠者雕以正貌姦邪者與之醜貌蓋亦寓褒貶於市俗之戲也

假面

物原季咸造胡面子 留青日札西京賦曰總會仙侶

戲豹舞熊白虎鼓瑟蒼龍吹簫注曰皆為假頭也假作

其形即今面鬼兒 建康實錄孫興公嘗著假面戲為

儼至桓宣武家溫覺其應對不凡推問之乃興公 隋

唐嘉話高齊蘭陵王長恭貌類美婦人乃着假面以對

敵今之人面是也 北史隋柳或上奏曰京邑爰及外

州每以正月望夜充階塞陌鳴鼓聒天燎炬照地人帶

獸面男為女服竭資破產競此一時請並禁斷上可其

奏老學菴筆記政和中大儺下桂府進面具比進到稱一副訝其少及見乃是八百枚為一副老少妍陋無一相似者乃大驚至今桂府作此者皆致富

高竿 繩戲

淮南子木熙者舉梧櫓據勾柱授豐條舞扶疎龍從鳥集搏援攫肆蔑蒙踊躍觀者莫不為之損心酸足彼乃始徐行微笑披衣脩擢注木熙今之上高竿者山堂肆考唐梯唐空也鹽鐵論言漢代百戲之目有曰上唐

梯即今之上高竿也 明皇雜錄玄宗御勤政樓張樂

百伎羅列教坊女優王大娘善戴竿舞頭戴長竿施木

山狀如瀛州方丈命小兒持絳節立其上而舞中音節

朝野僉載幽州人劉交戴長竿高七十尺自擎上下

有女十二甚端正於竿置定跨盤獨立見者不忍女無

懼色 西域傳作巴俞都盧之戲巴俞二州名都盧體

輕善緣高有跟挂腹旋之名 演繁露唐人以緣橦者

為都盧緣按國語胥臣對晉文公曰侏儒扶盧韋氏謂

扶緣也。廬子戟之秘緣之以為戲。淮南子鼓舞者非柔縱木熙者非渺勁淹漬漸靡使之然也。注鼓舞即今盤鼓者言其環繞便娟擬神也。事物紺珠槃鼓或石臼或大缸各於手掌足底跳弄之。張衡西京賦走索上而相逢注索上長繩繫兩頭於梁舉其中央兩人各從一頭上交相度所謂儻絙者也。晉樂志後漢天子受朝賀舍利從西來戲於殿前以兩大繩兩柱頭相去數丈兩倡女對舞行於繩上相逢切肩而不傾。通典

梁有高絕伎蓋今之戲繩者也 西京賦註衝狹者卷
簾席以矛插其中伎兒以身投從中過燕濯者以盤水
置前坐其後踊身張手跳前以足偶節踰水復却坐如
燕之浴也 唐樂志睿宗時婆羅門國戲人倒行以足
舞仰植鋤刀俯身就鋒歷臉下復值於背又伏伸其手
二人攝之周旋百轉 事物原始通典曰梁有舞輪之
伎今之舞車輪者此戲自梁始也

高牆

列子宋有蘭子以技干宋元君召見以雙枝長倍其身
屬蹻並馳弄七劍走而躍之後復有以驚戲干元君者
升菴外集趨音敲緣木行戲即列子所謂雙枝屬蹻
之戲也

格致鏡原卷六十

欽定四庫全書

格致鏡原卷六十一

大學士陳元龍撰

穀類

總

周易百穀草木麗於土 楊泉物理論梁稻菽三穀各
二十種為六十蔬果之實助穀各二十凡為百穀 鄭
玄周禮注三農生九穀稷秫黍稻麻大小豆大小麥也
凡王之膳食用六穀稻黍稷梁麥苽也以五味五穀養

其病麻黍稷麥豆也豫州并州其穀宜五種稻黍稷麥
菽也兗州其穀宜四種黍稷稻麥也幽州其穀宜三種
黍稷稻也楚辭大招注五穀稻稷麥豆麻漢食貨
志注五種麻金黍火稷土麥水豆木周書凡禾麥居
東方黍居南方稻居中央粟居西方菽居北方范子
計然五穀者萬民之命國之重寶東方多麥稻西方多
麻北方多菽中央多禾五土之宜各有高下高而陽者
多豆平而陰者多五穀淮南子江水肥而宜稻洛水

輕利而宜禾渭水多力而宜黍濟水通和而宜麥河水
中調而宜菽汾水濛濁而宜麻 孝經內事五車星主

五穀明則民無飢寒之困 山海經廣都之野百穀自

生冬夏播琴

播琴猶
播植

禮月令孟春天子乃以元日祈

穀於上帝孟夏驅獸無害五穀仲夏乃命百縣雩祀百

辟以祈穀實孟秋農乃登穀天子嘗新先薦寢廟 穀

梁傳一穀不升曰噍二穀不升曰飢三穀不升曰饑四

穀不升曰康五穀不升曰大侵五穀皆熟為有年 墨

予一穀不收謂之饑二穀不收謂之旱三穀不收謂之凶四穀不收謂之餽五穀不收謂之饑禮內則飯黍稷稻粱白黍黃粱稭稊注穀熟而穫之曰稭生穫之曰稊張揖廣雅黍稷謂之稊稻稷謂之稭稷稷謂之稭

東觀漢記建武二年天下野穀旋生麻菽尤盛王充論衡建武三十一年陳留雨穀蔽地視穀形若菜而黑此夷地所生穀也彼不食穀生於草野成熟委於地遭疾風與之俱飛風衰穀集中國中國見之謂天雨穀

也 劉敬叔異苑涼州張駿九年天雨五穀於武威燉煌殖之悉生因名天麥 唐書李泌請以二月朔為中和節民間以青囊盛百穀種相問遺號為獻生子 夢華錄京師七夕以小板上傅土旋種粟令生其苗置小茆屋花木作田舍家小人物皆邨落之態謂之穀板胡錡耕祿橐穀實封常熟縣開國公來牟封隴西郡開國侯米秣除祭酒馬穀除駕部

稻 附 稗 糠

總論 禮記稻曰嘉疏 爾雅稌稻也郭注今沛國呼

稌邢疏內則云牛宜稌豳風云十月穫稻是一物也

孝經援神契汚泉宜稻 淮南子稻生於水而不生於

湍激之流 亢倉子得時之稻莖葆長桐穗如馬尾失

時之稻纖莖而不滋厚糠而菑死 越絕書丁貨之戶

曰稻粟令為上種石四十 說文稻一秬為粟二十斗

為米十斗曰穀為米六斗大半斗曰粳 物理論稻者

溉種之總名 錦繡萬花谷本草云粳米味甘稻味苦

字書解秫字云稻也。秔字云稻屬也不黏者解粢云稻餅也。明稻米作粢蓋糯米也。今通呼秔糯米穀為稻所以惑之矣。今此稻米即是糯米也。顏師古刊謬正俗云本草所謂稻米者今之糯米耳。孔子曰食夫稻周官有稻人之職。漢置稻田使者此並指粳糯為一色也。養生要集秔稻屬稻亦秔之總名也。道家方藥有用稻米秔米此則是兩物也。稻米粒白如霜味苦主溫服之令人多瘦無肌膚。秔米味甘主利五臟長肌膚好顏色。周

禮王后獻種桂之種鄭注先種後熟謂之種後種先熟
謂之種 隋書婆登國有月熟之稻每月一熟 抱朴
子南海晉安有九熟之稻一歲九登 孔六帖天竺稻
一歲四熟 楊孚異物志交趾稻一歲再種 農田餘
話閩廣之地稻收再熟人以為獲而再種非也其鄉以
清明前下種芒種蒔苗一壠之間稀行密蒔先種其早
者旬日後復蒔晚苗於行間俟立秋成熟刈去早禾乃
鋤理培壅其晚者盛茂秀實然後收其再熟也 戒菴

漫筆稻花白而瓣少者米賤多而色黃則貴俗云銀花
賤金花貴也 廣志稻已割而復抽曰稻孫 孔鮒小

爾雅藁謂之稗稗謂之芻生曰穀謂之粒禾穗謂之穎
說文秬稻屬伊尹曰飯之美者玄山之禾南海之秬

呼到反

唐李百藥傳徐陵文刈瑯琊之稻百藥曰春秋

鄒子藉稻杜預謂在瑯琊 山堂肆考唐玄宗開元十
九年揚州奏穠生稻二百一十五頃再熟稻一千八百
頃其粒與常稻無異穠生自生稻也 唐地理志滄州

本魯城乾符元年生野稻水穀十餘頃燕魏飢民就食之博物志麋掘澤草而食其場成泥名曰麋暖一作暖

民隨其暖種稻其收百倍食貨志力耕數耘收穫如盜賊之至故熟速刈乾速積刈早則傷鎌刈晚則折穗遇風則收減濕積則藁爛積晚則粒耗連雨則生耳所以收穫不可緩也戒菴漫筆穠極杜牧之詩作罷亞注云稻名黃東發云罷亞稻之態非稻名也引蘇詩紅罷亞對碧玲瓏又罷亞對雍容皆用虛字為証孫光

憲北夢瑣言都會間有運大筆如椽或於稻粒上寫七
言詩一絕歷歷可愛

詳類 郭義恭廣志有虎掌稻紫芒稻赤穰稻白米稻
南方有蟬鳴稻七月熟有蓋下白正月種五月穫根復
生九月復熟青芊稻六月熟累子稻白漠稻七月熟此
三種大且長三枚長一寸半 庾肩吾謝賚米啓渚水
鳴蟬香聞七里瓊山合穎祖歸十縣 蔡邕月令章句
九月熟者謂之半夏稻 周處風土記秣稻之青穠米

皆青白也 唐書渤海有盧城之稻 曲洧舊聞洛下

稻田亦多土人以稻之無芒者為和尚稻亦猶浙中呼

師婆粳 中吳紀聞紅蓮早稻從古有之陸魯望云近

炊早稻識紅蓮 西域記摩揭陀有異稻巨粒號供大

人米

田藝衡曰即今江南之香珠稻也

湘山野錄真宗深念稼穡聞

占城稻耐旱遣使以珍貨求其種得二十石至今在處

播之

徐鉉曰即今之尖頭黃秈米也

魏志文帝與羣臣書曰江表惟

長沙有好米何得比新成粳稻耶上風吹之五里聞香

白居易詩祿米麋牙稻 王象晉穀譜香粳一名香
子粒小色斑以三十五粒入他米數升炊之芬芳香美
小香稻赤芒白粒其色如玉雪裏揀粒大色白稈軟而
有芒臘脂赤香柔而甘舂煮之作純赤色晚稻上品
顧峴海槎餘錄儋耳種旱稻曰山禾米粒大而香可食
連收三四熟 一統志雷陽界稻十一月下種揚雪耕
耘次年四月熟與他地迥異

異稻 王嘉拾遺記宣帝時背陰之國來貢方物言其

鄉在扶桑東有浹日稻種之十旬而熟有翻形稻食者
死而更生有明清稻食之延年有清腸稻食一粒歷年
不飢 段成式酉陽雜俎鄧都稻名重思其米如石榴
子粒稍大味如菱 拾遺記東極之東有和靈稻寒者
食之則體溫熱者食之則體冷莖多白 彙苑烏菴國
四熟之稻苗高沒駱駝米大如小兒指 續仙傳唐謝
玄卿遇神仙設龍睛稻

米 程大昌演繁露國語曰越大夫種謀曰今吳既罷

而大荒薦飢市無赤米注云米之惡者也案赤米今有
之俗呼紅霞米田之高仰者種之以其早熟且耐旱也
然則越時已有此米矣南史任昉傳昉解新安太守去
惟載桃花米即赤米是也東觀漢記第五倫節儉作
會稽郡受俸祿常求赤米蘇鶚杜陽編唐元和八年
大軫國貢紫米類巨勝子炊之一升得飯一斗食之令
人髭髮鬢黑顏色不老雲仙散錄杜甫在蜀以七金
買黃兒米半籃地理志揚州土貢黃桂米烏節米

品物類聚吳興米炊之甑香號國夫人廚吏鄧連以此
米擣為透花餠 陳師道後山叢談蜀稻先蒸而後炒
謂之火米可以久積以地潤故也蒸用大水空中為甑
盛數石炒用石板為釜凡數十石古詩注土人以五月
收米為火米 錦繡萬花谷荆南孫儒之亂米斗四十

千持金寶換易纔得一撮一合謂之通腸米言饑人不
可食他物惟煎米飲可以通腸胃 伽藍記西方佛沙

伏國有昔尸毘王倉庫為火所燒其粳米焦然於今猶

在若服一粒永無瘧患彼國人民須以為藥 韋斌傳
斌兄陟尚奢侈以鳥羽擇米 楊廷秀詩序上元夜里
俗用粉米為繭絲書古語置其中以占一歲之禍福謂
之繭卜

秣 廣雅秣稌也 字林糯黏稻也 廣志秣有赤有

白有胡秣早熟及麥 崔豹古今注稻之黏者為秣禾
之黏者為黍 胡侍珍珠船爾雅衆秣注云謂黏粟也
說文云秣稷之黏者也汜勝之書云粱是秣粟本草圖

經云丹黍米黏者為秣北人謂秣為黃米亦謂之黃糯
釀酒觀此則黍稷稻粱之黏者皆謂之秣而本草別出
秣米一條注謂似黍而粒小誤也 宋書陶潛為彭澤
令公田悉令種秣妻子固請種秬乃使二百五十畝種
秣五十畝種秬 黃省曾稻品其粒長而釀酒倍多者
謂之金釵糯其色白而性軟五月種十月熟者曰羊脂
糯其芒長而穀多白斑五月種九月熟謂之臘脂糯太
平謂之硃砂糯其厚稃紅黑斑而芒謂之虎皮糯其粒

最長白稈而有芒四月種七月熟謂之趕陳糯亦曰私
糯其粒大而色白芒長而熟最早其色易變而釀酒最
佳謂之蘆黃糯湖州謂之泥裏變言不待日之曬也其
粒圓白而稈黃大暑可刈其色難變不宜於釀酒謂之
秋風糯其不耐風水四月種八月熟謂之小娘糯壁墻
女然也其在湖州色烏而香者謂之烏香糯芒如馬鬃
而赤色者謂之赤馬鬃糯

杭字林杭稻不黏者杭糯甚相類黏不黏為異耳

本草粳米即人所常食米有白赤大小異族四五種同
一類也 張衡南都賦渥臯香秔 桓麟七說新城之
秔 傅巽七誨孟冬香秔 廣志秔有烏秔黑穰青幽
白夏之名 稻品種之小者謂之秈秈之熟也早故曰
早稻粳之熟也晚故曰晚稻京口大稻謂之粳小稻謂
之秈稻之上品曰箭子湖州有一穗而三百餘粒者謂
之三穗子

稗 六書故稗葉純似稻節間無毛實似蕒害稼 淮

南子籬先稻熟而農夫薅之者不以小利害大獲也高
琇注籬水稗 汜勝之書稗既堪水旱種無不熟之時
宜種之以備凶年稗中有米擣取米炊食之不減粟米
又可釀作酒 晉書吳孫亮五鳳元年交趾稗草化為
稻昔三苗將亡五穀變種此草妖也

糠 交州記合浦海口有糠頭山傳云越王舂米於此
積糠而成 韓非子鄒穆公有令食鳧雁者必以秕無
敢以粟鳧雁無食而以一石粟易一石秕其費甚矣

世說王文度謂范榮期曰簸之揚之糠粃在前 晉書
王戎子萬有美名而太肥戎令食糠而肥愈甚 齊書
顧歡家貧讀書燃糠自照

禾

總論 公羊注苗者禾也生曰苗秀曰禾 春秋說題
辭禾者銜滋液宋均注銜滋液以生故以禾為名 說
文禾嘉穀也木王而生金王而死得時之中故謂之和
禾之秀實為稼莖節為禾 詩註禾者總名黍稷稻粱

梁皆名為禾麻與菽麥則無禾稱 彙苑禾之秀特舒
散象火為南方之穀 亢倉子得時之禾長稠而大穗
圓粟而薄糠米粃而香舂之易而食之強失時之禾深
芒而小莖穗銳多粃而青齒 管子小問篇苗始其少
也眴眴乎孺子也其壯也莊莊乎士也至其成也由由
乎茲勉何其君子也天下得之則安不得則危故命之
曰禾 呂覽苗其弱也欲孤長也欲相與居其熟也欲
相扶是故三以為族乃多粟先生者美米後生者為粃

其耨也長其兄而去其弟不知稼者其耨也去其兄而
養其弟不收其粟而收其麤 淮南子孔子見禾之三
變注三變始於粟粟生苗苗成於穗 尚書天大雷電
以風禾盡偃王出郊天乃雨反風禾則盡起 宋書巨
邕三畝之禾一稔二米王者宗廟修則出 張鷟朝野
僉載諺云秋雨甲子禾頭生耳 史記管仲說桓公曰
古之封禪北里之禾所以為盛 呂氏春秋飯之美者
玄山之禾 陸璣草木疏禾秀為穗而不成謂之童梁

今人謂之宿田翁或謂之守田 方言穉穉禾所秀不
成聚向上貌

嘉禾 瑞應圖嘉禾五穀之長盛德之精也文者異本
而同秀質者同本而異秀此夏殷時嘉禾也 晉徵祥

說嘉禾仁卉也 春秋說題辭嘉禾之滋莖長五尺五

七三十五故連莖三十五穗以成盛德 尚書唐叔得

禾異畝同穎獻諸天子 拾遺記因祗國貢嘉禾一莖

盈車 光武本紀帝生於濟陽縣舍是歲縣界有嘉禾

生一莖九穗因名曰秀 古今注漢和帝時嘉禾生於
濟陰城陽安帝時九真嘉禾生 吳志赤烏中會稽嘉
禾生因改元為嘉禾 南史宋大明元年清暑殿西甍
鵠尾中央生嘉禾一株五莖遂改為嘉禾殿 宋書元
嘉中嘉禾生華林園十株七百穗 齊書孝武時固始
縣新蔡縣俱獲嘉禾 唐代宗紀太子初生之歲豫州
獻嘉禾乃更名豫

異禾 拾遺記炎帝時有丹雀銜九穗禾其墜地者帝

乃拾之以植於田食者老而不死 穆天子傳黑水之

阿爰有答董西膜之所謂木禾也郭璞注木禾穀類長

五尋大五圍

珍珠船王莽種五梁禾

即五色禾

於殿中先

鸞鶴髓玳瑁犀玉二十餘物漬種此黃帝穀仙之術也

拾遺記崑崙山第三層有禾穠一株滿車 廣五行

記東魏後靜帝天保初四月禾夜生於帝銅硯中及明

晨長數寸有穗 山堂肆考唐寧朔縣界荒地十五里

有黑禾偶出徧地掃盡經宿復生其禾圓實味甘美

粟

總論 說文粟禾子也嘉穀之實也粟之為言續也江東人呼粟為粢 春秋說題辭粟五變以陽化生為苗秀為禾三變而發謂之粟四變入臼米出甲五變而蒸飯可食 春秋佐助期粟神名許給姓庸天 通義呂氏書說有穀曰粟無穀曰米按粟即所謂穀也古人米與穀兼積米切用而易腐穀氣全而可久緩急兼儲後世軍儲獨以米故久即不可食 管子隰朋曰夫粟內

甲以處中有卷城外有兵刃未敢自恃自命曰粟此其
可比於君子之德乎 九章算述粟五十糲率三十粟
一石得糲米六斗 韻瑞糲脫粟也一斛粟舂七斗米
為糲 酉陽雜俎粟累十二為寸 周書神農之時天
雨粟神農耕而種之 淮南子倉頡作書而天雨粟
風俗通燕太子丹仰嘆天為雨粟 古今注武帝建元
四年天雨粟宣帝地節三年長安雨黑粟竟寧元年南
陽山都縣雨粟色青黑味苦大者如小豆小者如麻子

漢書孝武元狩六年太倉之粟陳陳相因紅腐而不可食 馬周疏五六年來頻歲豐稔一疋絹易粟十餘斛 宋書文帝時醴湖生嘉粟一莖九穗 唐紀宣宗時福建進瑞粟十五莖莖有五六穗 唐書大中元年二月停飛龍粟 山堂肆考紫帽山在泉州府唐時泉人客洛陽邂逅一羽衣寄書紫帽隱者隱者遺以米半升其人還家視之乃金粟也 宋徽宗御書金粟之洞四字刻石在焉

詳類 爾雅釐赤苗芑白苗郭注釐今之赤梁粟芑今

之白梁粟皆好穀邢疏詩維糜維芑故此釋之也釐與
糜音義同 本草粟米畚田種之甚易舂粒細香美陳
者或呼為粱大氏人多種粟而少種粱以其損地力而
收穫少耳粟米比粱乃細而圓 正字通古者以粟為

黍稷粱秫之總稱而今之粟在古但稱為粱後人乃專
以粱之細者名粟故唐孟詵本草言人不識粟要之黏
者為秫不黏者為粟因呼粱為秠粟以別秫而配秠北

人謂之小米也 李時珍本草粟即粱也穗大毛長粒粗為粱穗小毛短粒細為粟苗皆似茅種凡數十有青赤黃白黑諸色或因時地賦名早則有趕麥黃百日糧之類中則有八月黃老軍頭之類晚則有燕頭青寒露粟之類 晉史乘文公得玄山之粟而美之欲種之宮中 廣志有赤粟白莖粟黑粟張公斑粟 拾遺記背明國有雲渠粟叢生葉似芙蓉食之益顏色有搖枝粟其枝長而弱無風常搖食之益髓有鳳冠粟似鳳鳥之

冠食之多力有游龍粟葉屈曲如游龍也有瓊膏粟白如玉食此二粟令人骨輕員嶠山有鵠銜不周之粟粟穗長三大粒皎如玉 孔六帖東夷流鬼粟似莠而小

梁

曲禮梁曰薌蕕又歲凶大夫不食梁注以梁為加也

周禮食醫犬宜梁 說文梁性涼故謂之梁 物理論

梁者黍稷之總名 爾雅翼青梁殼穗有毛粒色青米亦微青而細白梁穗大毛長殼粗扁米白而大黃梁穗

大毛長殼米粗於白梁性甘氣平較他穀能益脾胃然
種之損地力粒尖小不耐水旱故種之者稀 本草注
黃梁香美逾諸梁俗呼竹根黃 廣志有具梁解梁遼
東赤梁 廣志鹽鑛梁粒如蟻子魏文帝嘗以為御粥
左思魏都賦雍丘之梁 崔駰七依玄山之梁 張
衡七辨冀野之梁 郎瑛七脩類藁梁即今之粟也古
不以粟為穀之名但粟厚字殼故米之有字殼者皆稱
梁

黍

總論 禮記 黍曰薌合 月令仲夏之月農乃登黍天子乃以雛嘗黍羞以含桃先薦寢廟 家語孔子侍坐於哀公設桃具黍公曰以黍雪桃也孔子曰黍者五穀之長祭先王以為上盛果有六而桃為下今以五穀之長雪果蓏之下是侵上忽下也 春秋佐助期黍神名併佞蘭郝 春秋說題辭精移火轉生黍夏出秋改山海經廣都之野后稷葬焉爰有膏黍膏稷 說文黍

禾屬而黏以大暑而種故謂之黍 古今注禾之黏者
為黍亦謂之稌亦曰黃黍 越絕書乙貨之戶曰黍為
中物石六十 亢倉子得時之黍穗不芒以長搏米而
寡糠失時之黍大本華莖葉膏短穗 山堂肆考黍苗
似蘆高丈餘穗黑色實圓重 爾雅翼楚人以菰葉包
黍炊而食之謂之角黍可為酒關東人謂之黃米酒亦
謂黍為黃糯 白六帖鄒衍吹律於燕谷燕谷乃暖生
黍 古今注宣帝元康四年長安雨黑黍 郭璞爾雅

注漢和帝時任城生黑黍或三四實實二米得黍三斛
八斗 史記管仲說桓公曰古之封禪鄒上之黍 張
協七命大梁之黍瓊山之米 嵇含孤黍賦序余慎終
屋之南榮有孤黍生焉因泥之濕遭雨之潤宿昔牙蘖
滋茂甚速塗燥根淺忽後萎殞深感此黍不韜種以待
時貪榮棄本寄身非所自取彫枯不亦宜乎

詳類 廣志有燕頷黍驢皮黍牛黍稻尾秀成赤黍馬
革大黑黍桓黍有溫毛黃黍白黍 珍珠船說文爾雅

翼皆謂黍為黏余按詩緝云黍有二種黏者為秫可以不
釀酒不黏者黍今關西總謂之糜子黏者曰黏糜子不
黏者曰飯糜子謂只堪作飯也孔子曰黍可以為酒亦
謂秫黍耳黍有丹黍白黍黑黍詩所謂維秬者也
有秬爾雅注所謂黑黍中一稭二米者也 七脩類藁
黍即今小米北方以之作酒小米有二種如稻有粳糯
耳黍是小米之糯者 博物志地節三年種蜀黍 穀
譜蜀黍一名高粱一名蜀秫一名蘆稭一名蘆粟一名

木稷一名荻粱以種來自蜀形類黍稷故有諸名種不宜卑下地

稷

班固白虎通五穀衆多不可一一而祭也稷五穀之長故封稷而祭之也爾雅粱稷邢昺疏左傳云粱食不鑿粱者稷也曲禮云稷曰明粱郭璞云今江東人呼粟為粱然則粱也稷也粟也正是一物而本草稷米在下品別有粟米在中品又似二物故先儒甚疑焉 珍珠

船徐鉉云楚人謂之稷關中謂之糜其米為黃米高瑋
云關西謂之糜通志云苗穗似蘆而米可食是皆誤認
黍為稷也余謂稷即粟米本草稷米甘無毒主益氣
補不足七脩類彙稷乃一歲中最先種者關西呼糜
冀州呼纂不甚珍貴農家種之以備他穀之不熟也即
南方所謂烏山稻類廣志破藏稷逼麥稷此二者以
四月熟爾雅翼稷一名稌呂氏春秋飯之美者山
陽之稌王粲七釋御宿青稌後漢書烏丸國其地

宜稌 曲洧舊聞稌西北人呼為縻子有兩種早熟者與麥相先後五月間熟者鄭人呼為麥爭場

麥

總論 羅願爾雅翼麥者繼絕續乏之穀夏時民乏食麥最先登 月令仲秋乃勸種麥毋或失時 月令孟夏之月農乃登麥天子乃以彘嘗麥先薦寢廟 漢書董仲舒曰春秋他穀不書至於麥禾不成則書之可見聖人於五穀最重麥與禾 王方慶疏宿麥以秋種故

謂之首種 漢武帝紀勸郡種宿麥注秋冬種之經歲
乃熟故號宿麥 月令孟夏麥秋至蔡邕注百穀各以
初生為春熟為秋麥以初夏熟故以四月為麥秋 越
絕書戍貨之戶曰麥為中物石三十 說文麥金也金
王而生火王而死麤周所受來麤也稍麥莖 亢倉子
得時之麥長稈而頸族二七以為行薄翼而醇音色食
之使人肥且有力失時之麥胗腫多病弱苗而翼穗
春秋佐助期麥神名福習 食物本草江南麥花夜放

故發病江北麥花晝放故宜人麥穗將熟時上有黑黴
者名麥孽主解丹石毒 汜勝之書凡田六道種麥為
首子欲富黃金覆謂曳柴壅麥根十畝可覆千石 郭
橐駝種樹書麥苗盛時須使人縱牧於其間令稍實則
其收倍多最宜雪諺云冬無雪麥不結 陶穀清異錄
臘雪熟麥春雪殺麥田翁以此占豐儉為脈家地理積
麥以十辛良下子不得過三辛收潑不得過三辛上場
入倉亦用辛日 農桑撮要防露傷麥但有沙霧即將

穀麻散拴長繩上侵晨令兩人對持其繩於麥上牽拽抹去沙霧則不傷麥 食物本草凡收麥以蠶沙和之辟蠹立秋前以蒼耳剉碎日曬收亦不蛀秋後則蟲已生蓋麥性惡濕故久雨水潦多不熟 宗慄荆楚歲時記夏至日取菊為灰以止小麥蠹 干寶變化論朽麥為蛺蝶 西域諸國志天竺以十一月六日為冬至則麥秀十二月十六日為臘則麥熟 皇甫謐玄晏春秋衛倫過予取糧糗以進予嘗之曰麥也有杏李柰三味

三果之熟也不同子焉得兼之倫退而告人曰士安之

識過劉氏

劉子陽食餅知鹽生

吾麥當杏時糅以杏汁李柰時又

糅以李柰汁故兼三味

梁簡文詩糧持三味麥衣進八簋綿本此

唐代宗

紀藍屋生穠麥 山堂肆考小說云人有中麥毒者夢

紅裳女子悲歌有一丸蘆菔火吾宮之句故朱文公次

秀野刈麥韻詩云未須蘆菔嚙妖娥 東坡詩注今大

內當麥熟時以黃羅帕封賜百官其外題曰麩 說文

麩小麥屑皮也

詳類 廣雅大麥麴也小麥稊也 廣志稊麥似大麥
出涼州旋麥三月種八月熟出西方赤小麥出鄭縣有
半夏小麥有秀芒大麥有黑穰麥 本草麥四種曰大
麥小麥穰麥蕎麥惟大麥久食令人肥白滑肌膚為麵
勝小麥而無燥熱冬十月下種至次年四月成熟田家
畦而種之賴以續食 爾雅翼大麥宜為飯又可作酢
其蘖可為餲 原化記大麥穀之善者也能沃以豉汁
則彌佳 呂氏春秋孟夏之昔殺三葉而獲大麥注昔

終也三葉薺芄蒹薈荇蓂也三葉死則大麥可穫矣

周密癸辛雜識小麥秋種冬長春秀夏實具四時之氣故小麥性微寒以為麴則溫麴則熱麴則冷慎懋官

花木考小麥種來自西國寒溫之地中華人食之率致風壅小說載中麥毒乃此也昔達磨遊震旦見食麴者驚曰安得此殺人之物後見菜菔曰賴有此耳蓋菜菔解麴毒也曲洎舊聞麥備四時之氣蕎麥葉青花白莖赤子黑根黃亦具五方之色然方結實時最畏霜此

時得雨則於結實尤宜且不成霜農家呼為解霜雨

後山叢談中秋陰晴天下如一蕎麥得月而秀中秋無

月則蕎麥不實穎諺曰黃鶻口噤蕎麥斗夏中候黃鶻
不鳴則蕎麥可廣種也唐書吐蕃有小麥青鰲麥蕎

麥五代史回鶻地宜白麥杜陽雜編唐元和八年

大軫國貢碧麥形大於中華之麥粒表裏皆碧香氣如

粳米食之體輕久食可御風田藝衡留青日札御麥

出於西番舊名香麥以其曾經進御故名御麥幹葉類

稷花類稻穗其苞如拳而長其鬚如紅絨其粒如芡實大而瑩白花開於頂實結於節 王世懋學圃雜疏西

番麥形似稷而枝葉奇大結子纍纍煮食之味亞芡實

夏樹芳詞林海錯韓愈詩納涼吸冷漬香檮香檮檮麥也楚詞稻粱檮麥挈黃粱些 爾雅藿雀麥郭注即

燕麥也 本草綱目雀麥生故墟野林下苗似小麥而

弱實似穠麥而細 陳懋仁庶物異名疏翻譯名義集

云迦師後堂云唐言錯麥慈和云北人呼為驚麥南人

呼為雀麥南泉抄以錯麥為大麥十誦指迦師為小麥
飯事鈔錯麥與迦師一物也 升菴外集古樂府云田
中燕麥何嘗可獲言虛名無用也然燕麥滇南霑益一
路有之土人以為朝夕常食非虛名也 穆天子傳爰
有野麥爾雅大菊蘧麥 賈思勰齊民要術瞿麥一
名地麵蒸曝乾舂去皮米不碎炊作飯甚滑細

異麥 晉起居注太康十年嘉麥出扶風郡一莖兩穗
頃皆有枝實三倍 崔鴻前涼錄永嘉元年嘉麥一莖

九穗生於姑臧 拾遺記背明國有延精麥延壽益氣
有昆和麥調暢六府有輕身麥食者體輕有醇和麥為
麴以釀酒一醉累月食之凌冬可袒有含露麥穗中有
露味甘如飴 紺珠木蘭麥一粒三寸 博物志近世
有田夫削木為麥入市糴之糴者無疑歸磨乃覺非麥
孔六帖唐同昌公主出降賜金麥銀米共數斛此皆
條枝國所獻

豆

總論 物理論菽者衆豆之總名 春秋佐助期豈神
名靈殖姓樂長七尺大目通於時節 亢倉子得時之
菽長莖而短足其莢二七以為族多枝數節競葉繁實
稱之重食之息失時之菽必長而蔓浮葉虛本疎節而
小莢 汜勝之種植書夏至種豆不用深耕豆花憎日
見日則黃爛而根焦 庶物異名疏梵文以大小豆等
為角果 魏志曹植詩煮豆以作羹漉菽以為汁 說
文萁豆莖也 古今注宣帝元康四年南陽雨豆 春

秋定元年隕霜殺菽傳注菽草之難殺者言殺知百草皆死

詳類 廣雅大豆赤也小豆答也脾豆豌豆溜豆也胡豆蜂蠶也豆角謂之莢其葉謂之藿巴菽巴豆也 廣志小豆一歲三熟味甘白豆麤大可食刺豆亦可食拒豆苗似小豆紫華可為麵生朱提建寧胡豆有青有黃者 古今注狸豆一名狸沙一名獵沙葉似葛而實大如李核可啗食虎豆一名虎沙似狸豆而大實如小兒

拳亦可食馬豆一名馬沙似虎豆而小實大如指亦可食也爾雅戎菽謂之荏菽郭璞注即胡豆也邢昺疏即大豆也管子威公北伐山戎以戎菽遍布天下

鄴中記石勒諱胡名胡豆曰國豆本草綱目大豆有

黑白黃褐青斑數色學圃雜疏菽有一種絕大而有

青黑色者味甘甚可佐盤飧王禎農書今之赤豆白

豆綠豆豉豆皆小豆也白豆亦曰飯豆越絕書丙貨

之戶曰赤豆為下物石五十已貨之戶曰大豆為下物

石二十 歲時雜記共工氏有不才子以冬至日死為疫鬼畏赤豆故是日作赤豆厭之 穀譜赤豆花名赤婢腐解酒毒 宋祁益州方物圖海紅豆春開花白色結莢枝間子如綴珠似大紅豆而扁皮紅肉白蜀人用為果釘 邢昺爾雅疏藺一名鹿藿其實名菹郭璞云今鹿豆也葉似大豆根黃而香蔓延生 穀譜綠豆以色名作菡非大者名植豆粒粗而色鮮者為官綠又名明綠皮薄粉多粒小而色暗者為油綠又名灰綠皮厚

粉少早種者名摘綠可頻摘也遲者名拔綠一拔而已
湘山野錄真宗深念稼穡聞西天萊豆子多而粒大
遣使以珍寶求其種得二石始植於後苑秋成日宣近
臣嘗之穀譜西粵無綠豆人或止帶斗餘多則至某
江輒遇風浪不能渡到彼中比於藥物凡患時疾者用
等秤買一家煮豆香味四達兩鄰對門患病人聞其氣
輒愈孔六帖夏侯端東走擷豈豆以食彙苑豈豆
一名野豈葉似葛而實長尺餘可蒸食一名豈菽陸

贊奏議豌豆為物其用甚微舊例所支唯充畜料穀
譜野豌豆一名翹搖粒小不堪用苗嫩時可茹升菴
外集胥豆見唐六典音彎學圃雜疏蠶豆初熟甘香
種自雲南來者絕大而佳荆湖近事李守愚侵晨并
華水吞黑豆五七粒謂之五臟穀至老視聽不衰方
書每日晨起空心煮豇豆入少鹽食之補腎學圃雜
疏白匾豆味甘益人種類殊多龍爪為下匾闊而甘糯
者最勝閩中四時不凋方春即食正字通菹豆一名

沿籬豆俗名蛾眉豆花狀如小蛾趙宦光曰扁豆一名
廣度豆 學圃雜疏刀豆可醬食性能殺蟲 品物類
聚白馬豆食之齒醉號國夫人廚吏鄧連以豆洗皮作
靈沙臙以供翠鴛堂 馮贄雲仙雜記王武子好馬每
節日則飼馬以明紗豆 留青日札雷州思靈島出米
苳枝葉似柳花如烏豆一種之後數年收實淮南子豆
之美者有米豆是也 花木考回鶻豆高二尺許直幹
有葉無旁枝角長二寸每角只兩豆一根才六七角色

黃味如粟 博物志鼠食巴豆三年重三十斤

異荳 拾遺記背明國有繞陰豆其莖弱自相縈纏有

挾劍豆其莢似人挾劍橫斜而生有傾離豆其豆見日

華垂覆地食者不老不疾豆莢大若指而綠一莖爛漫

數畝 杜陽雜編大歷中日林國獻靈光豆大小類中

國之菜豆其色殷紅而光芒長數尺亦呼為詰多珠和

石上菖蒲葉煮之即大如鵝卵其中純紫稱之可重一

觔以上啗一丸香美無比數日不復言饑渴 張端義

貴耳集大靈豆華山陳搏有之每服一粒而十九日不飢

麻

禮記仲秋之月天子乃以犬嘗麻先薦寢廟 亢倉子得時之麻疎節而色陽堅柔而小本失時之麻蕃柯短莖岸節而葉蟲 張揖廣雅狗蟲苴藤弘胡麻也 沈括筆談胡麻即今油麻 事物原始張騫使西域至大宛得其種植於中國或向名胡麻石勒時諱胡字改名

芝蔴隋大業四年改胡麻曰交麻 穀譜脂麻以多油
名俗作芝蔴者非 蘇恭曰八稜者名巨勝四稜六稜
者名胡麻廣雅謂之狗蟲八穀中最為大勝故名巨勝
爾雅翼巨勝胡麻之黑者 无上祕要雲草玄液者
黑苽勝是也一名玄清 拾遺記背明國有紫沈麻其
實不浮有雲冰麻實冷而有光宜為油澤有通明麻食
者夜行不持燭是巨勝也食之延年有飛明麻葉黑實
如玉風吹之如塵亦名明塵麻有紫實麻粒如粟色紫

迺為油則汁如清水食之目視鬼魅有側麻葉如倒莖
紅紫色亦名紅冰麻言冰寒乃有實食之令人顏色潔
白 紺珠屯羅麻實如蓮葯 抱朴子胡麻一名方莖
服餌不老耐風濕其葉名青裏 蘇軾與程正輔書胡
麻入少白蜜為麪食之日久益氣力百病自去

格致鏡原卷六十一